

Siunnersuut uunga: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2015-imeersaq. (tuniniaanissamik nittarsaassisarnermut inatsit)
(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Akissuteqaat
(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Aappassaanneerpeqarnera
Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisissaannut siunnersuutip aappassaanneeneqannginnerani, siunnersuutip tapersorsorneqarnera nuannaarutigigakku Naalakkersuisut sinnerlugit matumuuna oqaatigissavara.

Taamatuttaaq amerlanerussuteqartut siunnersuutip akuerineqarnissaa inassutigalugu, Inuussutissarsiornermut Ataatsimiititaliap peqqissaartumik isumaliutissiissuteqarneranut Naalakkersuisut qujarusupput.

Siunnersuut atuisartunik illersuinissamut pingaaruteqartunik maleruagassanik imaqarpoq aammalu siunnersuut ataatsimiinnerni arlalinni sammineqareerluni, maannakkut akuerineqartussangortutut isikkoqarnera Naalakkersuisut nuannaarutigaat.

Siunnersuummi § 8-imut tunngatillugu oqallittoqangaatsiarsimasoq Naalakkersuisut maluginiarpaat. Tamanna Naalakkersuisut paasilluarsinnaavaat aammalu oqallinneq taanna pingaaruteqartoq pisariaqartorlu isumaqataallutik. Peqatigisaanik ataatsimiititaliami ilaasortat amerlanerussuteqartut maannakkut oqaaseqatigiiliornera allannguuteqartinnagu akuerineqassasoq siunnersuutigimmassuk Naalakkersuisut nuannaarutigaat.

Taamatut oqaaseqarlutik Naalakkersuisut siunnersuut Inatsisartuni suliarineqartussangortippaat.